

4. konferencija Platforme dijaloga posvećena implementaciji ciljeva održivog razvoja u Bosni i Hercegovini je održana u Sarajevu u organizaciji Predsjedništva BiH i Ujedinjenih nacija (UN) u BiH.

Ostvarivanje ciljeva održivog razvoja i značaj opredjeljenja da zemlja u potpunosti preuzme odgovornost za ciljeve su bili u fokusu konferencije kojoj su prisustvovali specijalni predstavnik Evropske Unije u BiH, ambasadori Njemačke, Švicarske, Švedske, specijalni izaslanik za ciljeve održivog razvoja, ministrica odbrane BiH, kao i predstavnici svih nivoa vlasti, lokalni poduzetnici i predstavnici organizacija civilnog društva.

Predsjedavajući Predsjedništva Bosne i Hercegovine Mladen Ivanić je istaknuo da pitanja održivog razvoja moraju animirati sve sfere društva – i javni i privatni sektor, te nevladine organizacije i civilno društvo.

“Predsjedništvo BiH je početkom godine zadužilo Savjet ministara da zajedno sa entitetskim vladama napravi prijedlog strategije održivog razvoja unutar BiH, ali te stvari kod nas još ne privlače dovoljnu pažnju i očigledno se puno više napora posvećuje nekim drugim, a ne suštinskim temama. To treba da bude primjer i vodilja kuda neko društvo, odnosno neka zemlja treba da ide i kako se približiti opšteprihvatljivim normama u svijetu”, rekao je Ivanić. Izrazio je zadovoljstvo činjenicom da su Ujedinjene nacije u BiH organizirale ovu konferenciju, te na taj način izvršile pritisak na institucije vlasti u BiH da se bave ovim poslom.

Rezidentna koordinatorica UN-a u BiH, Sezin Sinanoglu, podsjetila je da su države članice UN-a 2015. godine usvojile Agendu 2030 koja je formulirana u 17 ciljeva održivog razvoja kao novi, globalni okvir u kojem su ekonomski, društveni i okolišni elementi integrirani u jednu sveobuhvatnu razvojnu strategiju. BiH je prihvatila sve ove ciljeve 2015. godine, čime je postala potpisnica ove agende.

„Agenda 2030 i njenih 17 ciljeva predstavljaju “Agendu nade”, koja treba doprinijeti iskorjenjivanju siromaštva, smanjivanju gladi u svijetu, boljoj zaštiti okoliša, suočavanju s klimatskim promjenama, te treba dovesti do značajnih partnerstava koja će voditi do postizanja ovih ciljeva u cijelom svijetu.” kazala je Sinanoglu. Pojasnila je da bi ovih 17 ciljeva trebali doprinijeti ostvarenju održivog razvoja u BiH, a ljude u BiH bi trebalo informirati o ciljevima održivog razvoja, te pokrenuti djelovanje u svim sektorima društva, vladinim i nevladinim organizacijama, civilnom i privatnom sektoru, tako da svi rade zajedno u partnerstvu. Istakla je da spomenuti ciljevi nisu bitni samo za nerazvijene već i za razvijene zemlje.

Udruženje “Aarhus centar u BiH” je također uzelo učešća na ovoj vrlo značajnoj konferenciji, kao jedan od predstavnika civilnog sektora.



BiH: Održana konferencija o ciljevima održivog razvoja

Izvor: aarhus.ba